



Broj: UP-I-KSI-09-10/22
Datum: 21.10.2022. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba Zakona od strane A.H. iz Brčkog, Brčko distrikt BiH, na 34. sjednici održanoj dana 21.10.2022. godine donijela je sljedeće

RJEŠENJE

1. **UTVRĐUJE SE** da je A.H. iz Brčkog, član Vijeća nacionalnih manjina Brčko distrikta Bosne i Hercegovine, kao nosilac javne funkcije postupio protivno članu 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine, na način što u roku od 30 dana od dana stupanja na javnu funkciju, Komisiji za odlučivanje o sukobu interesa nije podnio izvještaj o imovinskom stanju nosioca javne funkcije.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, A.H. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, izriče opomena.

Obrazloženje

Komisija je po službenoj dužnosti Zaključkom broj: UP-I- KSI-09-10/22 od 26.08.2022. godine, pokrenula postupak protiv A.H. iz Brčkog, nosioca javne funkcije, jer je uočila da postoji osnovana sumnja da isti nije dostavio Komisiji ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, čime je postupio protivno odredbama iz člana 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine (u daljem tekstu: Zakon), te imenovanog pozvala na izjašnjenje o datim navodima.

Uvidom u Odluku o imenovanju člana Vijeća nacionalnih manjina Brčko distrikta Bosne i Hercegovine broj: 01-02-1452/22 od 06.04.2022, utvrđeno je da je A.H. imenovan za člana Vijeća nacionalnih manjina Brčko distrikta Bosne i Hercegovine.

Uvidom u Aneks I- Obrazac o javnoj funkciji i nosiocu javne funkcije, utvrđeno je da je A.H., kao član Vijeća nacionalnih manjina Brčko distrikta Bosne i Hercegovine, stupio na javnu funkciju 06.04.2022. godine.

Provjerom službene evidencije, odnosno Registra javnih funkcija i nosilaca javnih funkcija, kao i Registra o imovinskom stanju, utvrđeno je da A.H. do dana donošenja zaključka, odnosno 26.08.2022. godine nije podnio Komisiji ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, odnosno propustio je da u roku od 30 dana od dana stupanja na javnu funkciju podnese Komisiji Izvještaj o imovinskom stanju.

Nakon prijema Zaključka o pokretanju postupka broj:UP-I-KSI-09-10/22 od 26.08.2022. godine, zaprimljen dana 06.09.2022. godine, A.H., član Vijeća nacionalnih manjina Brčko distrikta Bosne i Hercegovine, kao nosilac javne funkcije, dostavio je Komisiji Izjašnjenje 21.09.2022. godine, u kojem navodi, između ostalog da nije imao saznanja da je potrebno da dostavi isti izvještaj, te da će ga o zakonskim obavezama dostavljanja izvještaja, obavijestiti institucija u kojoj obavlja javnu funkciju ili Komisija. Uz isto izjašnjenje A.H. je dostavio i ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, te je postupio shodno Zaključku Komisije i otklonio razloge i okolnosti koji su ga doveli do kršenja odredaba Zakona.

Član 19. stav (1) Zakona, propisuje da je nosilac javne funkcije dužan u roku od 30 dana od dana stupanja na javnu funkciju podnijeti Komisiji ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, a prema stanju na dan kada je izabran, odnosno imenovan.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije nosiocu javne funkcije koji postupi suprotno članu 19. Zakona o sprečavanju sukoba interesa u institucijama Brčko distrikta Bosne i Hercegovine.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda Zakona, s obzirom na to da je A.H., kao nosilac javne funkcije, propustio da u roku od 30 dana od dana stupanja na javnu funkciju, člana Vijeća nacionalnih manjina Brčko distrikta Bosne i Hercegovine, podnese Komisiji ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, čime je postupio protivno gore navedenim zakonskim odredbama.

Prilikom odlučivanja o vrsti sankcije, koju treba izreći, Komisija je shodno članu 43. Zakona, vodeći računa o težini povrede i posljedicama povrede Zakona, te činjenici da je A.H., nosilac javne funkcije odmah po prijemu Zaključka podnio Izvještaj o imovinskom stanju, te se prema njegovom postupanju i odgovornosti, ličnosti nosioca javne funkcije, odnosu imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici radi o očito lakom obliku kršenja odredaba Zakona, koje nisu nanijele štetu integritetu javne funkcije koju A.H. iz Brčkog obavlja, pa je Komisija stava da izrečena opomena odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom u Brčko distriktu BiH.

Predsjednik
Komisije za odlučivanje o sukobu interesa

Admira Mujić, dipl.pravnik

Dostavljeno:

1. A.H. iz Brčkog, Brčko
2. Internet stranici Komisije,
3. Evidenciji i
4. **Arhivi.**